

Sámi allaskuvla
STIVRAČOAHKKIN
2 / 08 25.04.2008
Dii 10.00 – 12.30
Telefončoahkkín

BEAVDEGIRJI



SÁMI ALLASKUVLA SAMISK HØGSKOLE

SÁMI ALLASKUVLLA STIVRA ČOAHKKINGIRJI

Stivramiellahtut čeahkkimis

Siskkáldas áirasat:

Steinar Pedersen, rektor ja stivrajođiheadđi
Marit Breie Henriksen, prorektor ja stivrra
nubbinjođiheadđi
Jan Idar Solbakken
Johanna Ijäs
Marit Kirsten Sara

Olggobeale áirasat:

Tove Bull, ozai ja oačču permišuvnna dii 10.20 rájes.
Ellen Inga O Hætta, ozai ja oačču permišuvnna dii
11.00 rájes.
Svein Ole Granefjell
Veli-Pekka Lehtola

Studeantaáirasat:

Inger Cecilie Saari
Máret Susanne Inger Eira

Diedihhan ahte eai boađe:

Karen Máret Sara

Hálddáhusas:

Doaimmi allaskuvladirektora Márjá Katarina Páve

Čálii:

1. konsuleanta Risten Ravna Länsman

Dulka:

Mikkel Magnus Utsi

S-ášši 10/08: ČOAHKKINGOHČČUMA JA ÁŠŠELISTTU DOHKKEHEAPMI

ÁŠŠELISTTU – STIVRAČOAHKKIN 2/08 – 25.04.2008

S-ášši 10/08: ČOAHKKINGOHČČUMA JA ÁŠŠELISTTU DOHKKEHEAPMI

S-ášši 11/08: STJERNØLÁVDEGOTTI ÁRVALUSAT

S-ášši 12/08: ERENOAMÁŠ VIRGELOBIT

S-ášši 13/08: VÁLGASTIVRRA NAMMADEAPMI ÁIGODAHKII 25.04.08 - 31.7.2011

S-ášši 14/08: DOB NJUOLGGADUSAID OÐASMAHTTIN

S-ášši 15/08: SADJÁSAŠ DIREKTORII SADJÁSAŠ ÁIGODAHKII 13.5.08 – 6.8.2008

S-ášši 16/08: EARÁ

Allaskuvlastivrra mearrádus ovttajienalaččat:

Allaskuvlastivra dohkkeha čoahkkingohččuma ja áššelisttu.

S-ášši 11/08: STJERNØLÁVDEGOTTI ÁRVALUSAT

Allaskuvladirektora árvalus:

Sámi allaskuvlla stivra addá, mearrádusa S-ášši 05/08 vuoduin, čuovvovaš gulaskuddancealkámuša NOU 2008:3 *Sett under ett – Ny struktur i høyere utdanning*:

Ođđajagimánu 2008 buvttii lávdegoddi man ráđdehus lei nammadan čielggadit viidásit ovdáneami alit oahpu siskkobealde iežas evttohusa. Evttohusa guovddáš lei geahčadit universitehtaid ja allaskuvllaid struktuvrra, nu ahte sáhtta leat fárus dusteme servodaga dárbbuid ja návccaid ávkastallat bures. Lávdegoddi buvttii viiddis evttohusa mas vuđolaččat ledje meannudan riika alit oahppobáikkiid organiserema, nu movt lávdegotti mandáhtta lei. Goitge, Stjernø-lávdegotti evttohusa láivvimus čuokkis lei Sámi allaskuvlla ovdanbuktin. Dán eat lean vuordán. Sámi allaskuvla lea fágalaš ođot, ásahuvvon vuhtiiváldit eamiálbmoga, sámiid, beroštumiid dan ektui ahte hálldašit iežas kultuvrra ja servodaga. Dát livčče leamaš Stjernø-lávdegotti vejolašvuohta duođaid ovdanbuktit Sámi allaskuvlla, sihke prinsihppalaš ja konkrehta vuodu mielde. Dán vejolašvuođa lea Stjernø-lávdegoddi eanás diktán ráfis.

Dan sadjái lea Sámi allaskuvla duohtavuodas ovdanbukton dábalaš allaskuvlan, ja árvoštallon dan vuodul. Dát guoská ovdamearkkadihte sihke allaskuvlla sturrodahkii, studeanttaid ohcama ektui ja buvttadeami ektui. Stjernø-lávdegoddi lea muittuhan iežas ahte Sámi allaskuvla lea sámiid allaskuvla, muhto ii fal maidege eanet go dan.

Iesgudet sajiin evttohusas gávdná oanehis čállosiid Sámi allaskuvlla birra.

Siiddus 119, nuppi spálttas gávdná lávdegotti árvoštallamiid Sámi allaskuvlla birra ja dan motiverema. Čuovvovaš siiddus evttohusas, s.120, vuosttáš spálta, čuovvu lávdegotti evttohus mas leat guokte válđočuoggá. Daid sisdoallu lea:

1. Høgskolen har lav produktivitet og svak søkning.
Årsaken til det er i følge utvalget at høgskolen er svært liten. Botemidlet til det er å knytte høgskolen til et større miljø for eksempel Universitetet i Tromsø eller en ny større institusjon i Nord-Norge. Men – positivt nok – man antyder også muligheten for å etablere en større felles nordisk samisk høgskole.
2. Samisk høgskole innrømmes en særstilling ved at den ivaretar behovene og interessene til en urbefolkning.
En eventuell omorganisering må følgelig skje på en måte som ivaretar høgskolens og samenes identitet og egenart. Premissene er her at det utløser et sterkt engasjement og substansielt akademisk bidrag fra de andre nordiske landene.

Sámi allaskuvlla cealkámuš lávdegotti čielggadeapmái lea okta obbalaš oassi, ja okta oassi mas kommenteret daid iešguhtet evttohusaid.

I: Obbalaččat

Sámi alit oahppu álggahuvvui juo mišunáiggi álggus birrasiid 1720 Troandimis. Dalle ásahuvvoje Seminarium Lapponicum, Seminarium Domesticum ja Seminarium Scholasticum. Riika vuosttaš professor sámegielas, Knud Lem, doaimmai Troandimis, gasku 1700-loguin. Maŋŋil go doaimma Troandimis loahpahuuvui, lei sámi alit oahpus heajos dilli gitta maŋŋil nuppi máilmmisoadi. Dáruiduhttiáiggi ledje maidai nanu fámut mat čuočču hedje ahte sámiin eai lean gálggat dákkár ohppui.

Jagi 1972 ásahii gal Lærerutdanningsrådet lávdegotti mii galggai čielggadit vejolašvuodaid nannet sámi oahpaheaddjeoahpu, vuosttažettiin go ásaha sámi ossodaga oahpaheaddjeoahpus Álttás. Lávdegoddi buvtii iežas evttohusa jagi 1973 ja sámi ossodat ásahuvvui¹.

Jagi 1982 biddjui formála ovddasvástádus čielggadit jearaldagaid mat oanehit ággis čatnásit sámi oahpaheaddjeohppui, Finnmarkku guovlolaš allaskuvlastivrii (Det regionale høgskolestyret for Finnmark), Kultur- ja dieđadepartemeantta ávžžuhusa mielde reivves njukčamánu 26. beaivvi 1982. Allaskuvlastivra nammadii lávdegotti seammá jagi, ja borgemánu jagi maŋŋil, bukte sii iežaset evttohusa².

Dán namuhuvvon evttohusa kapihttal njealjis, ovdanbukto Hoëm-lávdegotti prinsihppalaš oaidnu sámi oahpaheaddjeoahpu ektui. Dat lea, oanehaččat daddjon, ahte sámi oahpaheaddjeoahpus ferte leat eaktun ahte dat hukse dan ala ahte sámi servodaga ovdáneapmi ja sámi oahppovuogádaga ovdáneapmi mannaba buohtalaga. Lávdegoddi oaivvildii viidásit ahte sáhttit bargat ásahit sierra dávviriikaidlaš sámi dieđalaš allaskuvlla. Dát sáhtta ávkastallat návcaim mat leat dan golmmá riikain ja dan láchkái ovdánahttit nanu ja movttideaddji fágabirrasa.

Deháleamos oanehitáigge čovdosat ledje:

- a. Addit sámi oahpaheaddjeoahpu doahpagii ođđa sisdoalu lávdegotti prinsihppalaš oainnu mielde.
- b. Addit sámi ossodahkii Álttá oahpaheaddjeoahpus eanemus autonoma rolla.
- c. Nannet sámi ossodaga dan bokte go lasiha resurssaid ja go nuppásorganisere oahpaheaddjeoahpu Álttás.
- d. Maŋŋil dákkár nannejumi berre ossodat sirdojuvvot eret ja hábme dan vuosttaš ceahki sámi allaskuvlla ásaheamis.

¹ Lærerutdanningsrådet, 1973. *Utredning om lærerutdanning for samedistriktene*. (Hoëm I)

² Det regionale høgskolestyret for Finnmark, 1983. *Samisk lærerutdanning*. (Hoëm II)

Jagi 1978 buvttii Sámi Instituhtta, olggobeal lávdegotti bokte, evttohusa ahte ásahit davviriikasaš dieđalaš sámi allaskuvlla³. Lávdegotti evttohus čuojai válđoássiin seammálahkáii go evttohus jagis 1973 namuhuvvon dás ovdal.

Dain čielggademiin mat maŋŋil leat boahtán, leat sihke Nergård-⁴ ja Mjøs-lávdegotti⁵ čielggadeamit dorjon daid ovddiid evttohusaid ahte nannet ja ovdánahttit Sámi allaskuvlla dieđalaš allaskuvlan. Nergård-lávdegoddi doarju Sámi allaskuvlla oainnu ahte allaskuvla álggu rájes juo lea doaimman dieđalaš allaskuvlan, ja ferte oažžut státna dan mielde. Mjøs-lávdegoddi evttoha ahte dilli láchčojuvvo nu ahte allaskuvla galgá sáhttit iežas ovdánahttit akkrediterejuvvon dieđalaš allaskuvlan.

Čielggadeamit leat iežaset evttohusaiguin prinsihppalaš ovttavásttolašvuodas sámi servodaga obbalaš ovdánemiin, gos sámi ásahusat leat ilbman ja Sámediggi vuosttamuččas, dan vuodul go riika vuodđoláhka rievdaduvvui sierra sámiparagrafa bokte, mii sihkkarastá ovttárvosašvuoda gaskal sámegiela ja dárogiela ja sámi kultuvrra ja norgga kultuvrra.

Buot evttohusain Hoëm I rájes Nergård-lávdegotti evttohusa radjái deattuhuvvo ahte berre oaidnit čovdosiid sámi oahpahasdoaimbajuiin oktii sámi kultuvrra ja sámi servodaga ovdánemiin. Dat mearkkaša ahte ii geahča čovdosiid sámi oahpahasdoaimbajuiin vuosttažettiin nu movt norgga servodaga oahpahasásahusat lea ovdánan.

Spiehkasteamit dán linjjás ovdanbuktojuvvojit St.meld nr 34 (2001-2002) *Kvalitetsreformen – Om høyere samisk utdanning og forskning*. Dás oaidná čovdosiid dan mielde ahte sámi oahpahasgázaldagaid buoremusat sáhtta ipmirdit ja čovdit norgga sosiokultuvralaš fenomenan. Kapihttalis 9.2.2 St.meld nr 34 (2001-2002) cealká ge dan dihte ahte: ”Universitetet i Tromsø skal fortsatt ha et hovedansvar for utdanning og forskning for den samiske befolkning innenfor et bredt fagspekter”.

Čállošis gonagaslaš Girko-, Oahpahas- ja Dutkandepartemeanttas beaivádan 23.06.1995, lei Sámi allaskuvlii biddjon našunála ovddasvástádnus sámi alit oahpu ovddas. Dan dihte lea veahá vuordemeahtun ahte Sámi allaskuvla Stuoradikkedieđáhusas nr 34 (2001-2002) dušše oažžu vejolašvuoda akkrediterejuvot dieđalaš allaskuvlan dan orgána bokte mii akkreditere oahpahasásahusaid dan dábbalaš norgga alit oahpahasvuogádagas (Nasjonalt organ for kvalitet i utdanningen – NOKUT).

Ođđabeaivvi jagi 2005 ovttastahttojuvvuiga Sámi Instituhtta ja Sámi Allaskuvla oktasaš davviriikalaš ásahussan dutkama ja oahpahas vátas ja mas lea buotsámi/davviriikalaš stivra olles dan čohkkejuvvon doaimma ovddas. Dát ođot jotkii iežas internášunála doaimmain sihke dutkamis ja oahpahasas, juoga mii fas nannii dan viiddiduvvon sámi allaskuvlla hámi oktasaš davviriikalaš sámi dieđalaš allaskuvlan.

Norgga almmolaš čielggademiin 2008:3, Stjernø-lávdegotti evttohusas, ovddasta válđoaidnu dan seammá linjjá man gávdnat St. meld nr 34 (2001-2002). Dan sadjái ovdanbuktojuvvo vejolašvuodta, gávdnat čovdosiid sámiiid iežaset oainnu mielde. Jus geahčesta referansalistui s. 238-243 (NOU 2008:3) duodaštuvvo dát oaidnu. Geavahuvvon girjjálašvuoda listtus leat unnán, várra iioktage, čállošat mat leat eamiálbmogiid saji birra alladási oahpahasvuogádagaid ektui moderniserenproseassas.

³ Nordisk Samisk Institutt, 1978. *Samisk lærerutdanning i Finland, Norge og Sverige – den eksisterende situasjon, behov, stimulering, opptak, utvikling og samordning*

⁴ NOU 2000:3. *Samisk lærerutdanning – mellom ulike kunnskapstradisjoner*.

⁵ NOU 2000:14. *Frihet med ansvar – om høyere utdanning og forskning i Norge*.

II: Erenoamaš

Siiddus 119 ovdanbukto ahte Sámi allaskuvllas lea buvttadeapmi unni.

Dán čuožžuhusa lea Sámi allaskuvla beassan gullat rahpama rájes jagi 1989. Dát mearkkaša ahte allaskuvla árvvoštallo buvttadanmihtuid ektui mat leat ráhkaduvvon dábálaš allaskuvllaide Norggas, dárogiella rekrutterenvuođđun, iige buvttadanmihtuid vuodul ráhkaduvvon Sámi allaskuvlla ovddas, sámeigiella vuodđun. Dát addá dieđusge áibbas iešguhtetlágan vuolggasajiid.

Sámi allaskuvla lei maid dai dan dilis go álggahuvvui jagi 1989, ahte váilo oahppan bargiid oahpahit sámegeilli, earret rektor. Vuosttaš bargun šattai dieđusge gealbodahttit sin geat ledje allaskuvllas, ja sin geat maŋŋil bohto dohko. Ahte allaskuvla dainna lihkestuvai bohtá ovdan tabeallas 4.1 Stjernø-lávdegotti evttohusas (s.227). Dán tabealla mielde bohtá Sámi allaskuvla 7. sadjái Norggas bargiid logu ektui geain lea 1. virgegelbbolašvuhta. Dát ferte lohkat hirbmat buorren, go Sámi allaskuvla lea ferten gávdnat čovdosiid daidda váttisvuodaide máid váilevaš fágabargit sámi allaskuvllas sáhte dagahit, ja movt daid sáhtii čovdit oalát iešalddis Guovdageainnus. Bargu dainna váttisvuodačoavdimiin ii boađe oidnosii makkárge buvttadanregistemis dahkkon departemeanttas.

Seammá alla vuoruheami attii Sámi allaskuvla dasa ahte ovdánahttit sámi fágasisdoalu Sámi allaskuvllas. Maid dai dat lei áibbas ođđa bargu Norggas. Dan máid allaskuvla lea oláhan dan suorggis, sáhtta čájehuvvot dainna ahte Sámi allaskuvllas lea dál stuorimus bargoveahka sámi gielladutkin geain lea eanemus gelbbolašvuhta Norggas. Sámi allaskuvla maid dai oáččui Oahppokvalitehtabálkášumi jagi 2005 Oahppo- ja dutkandepartemeanttas, sámi pedagogihka bargguset ovddas.

Sámi fágasisdoalu ovdánahttinbargu máid allaskuvla lea bargan iige leat registevuvvon departemeantta buvttadanregistemiin.

Ferte dušše oaidnit ahte unnán lea bargu allaskuvlla vuoruhuvvon bargguiguin váldon fárrui makkárge buvttadanmihtideamis. Dat mii lea bohtán fárrui dákkár mihtideamis, lea studeantabuvttadeapmi. Studeantabuvttadeapmi lea dieđusge čadat dáhpáhuvvan 1989 rájes, lassin dan vuodđudeaddji bargguin mii lea dahkkon ovdánahttit sámi allaskuvlla daid allaskuvla definišuvnnaid mielde mat leat addon čielggademiin ráhkaduvvon 1973 rájes ja gitta dán beaivái.

Siiddus 119 Stjernø-lávdegotti evttohusas daddjo maid dai ahte unnán studeanttat ohcet Sámi allaskuvlii.

Fas lea dat mainna buohtastahttet movt ohcan lea daidda dábálaš allaskuvllaide allaskuvlavuogádagas.

Jus árvvoštallá ohcama Sámi allaskuvlii sámi konteavsttas, leat sámit loguid mielde unna álbmogaš mas eai leat nanu árbevierut alit oahpu váldit. Sámi allaskuvla lea dasa lassin ođđa ásašus mii lea hui čalbmáičuohci eará alit oahpahussii Norggas dan bokte go lea ođdaseamos allaskuvla ja áidna sámi alit oahppobáiki. Dat lea vuodđuduvvon sámeigiella ja sámi kultuvrra ala, kultuvralaš vuodđu mii maid dai dál doaibmá lunddolaš rekrutterenvuođđun sámi nuoraide geat hálidit bajás ja ovddasguvlui.

Allaskuvla dárbbáša dasto ovttá áigodaga sáhttit duodaštit sámi nuoraide ahte dat lea buorre oahppobáiki sidjiide.

Ja loahpas lea Sámi allaskuvla áidna allaskuvla gos sámeigiella lea sihke hálddážusgiella ja oahpahusgiella. Dás lea hirbmat stuora mearkkašupmi ahte ovdánahttit sámeigiella oahpahus- ja dieđalašgiellan. Seammás hábme dat hástalusaid sámiid ektui geat bohtet guovlluin gos dáruiduhttinproseassa lea leamaš erenoamaš gievra. Erenoamažit mearrasámi nuorat leat juogo massán sámeigelaset, dahje unnán máhttet dan atnit oahpahusdilálašvuodas. Dan dihte vásihit mii ahte nuorat eai balljo váldde dan liige oahpponoadi man sámeigiella ovdakurssa gáibida, ja de dan atnit oahppogiellan.

Lea veolaš ahte áigi lea dievvan ovdanahttit oahppofálaldaga eamiálbmot kultuvrraid birra ja fállat norgga nuoraide obbalaččat. Jus dainna lihkostuvvá, sáhtta dat addit lassi ohcama allaskuvlii mii lea duhtadeaddji maid dai dábaláš dáččakultuvrralaš allaskuvllaid ektui.

Siiddus 119 Stjernø-lávdegotti evttohusas daddjo ahte Sámi allaskuvlii miedihuvvo erenoamaš sadii go dat váldá vuhtii álgoálbmoga dárbbuid ja beroštumiid.

Jus nu dáhpáhuvvá lea dat mearkkašahtti dáhpáhus Norgga hálddašeamis sáme kultuvrra ja sámi álbmoga ektui. Dákkár miediheapmi máksá dan ahte dat evttohusat mat leat boahtán alit oahpu ja dutkama čielggademiin, juo 1973 rájes, dohkkehuvvojit. Ahte dákkár nuppásorganiseren ferte dáhpáhuvvat dakkár vugiin ahte vuhtiiváldá sámiid identitehta ja erenoamašvuoda sáhtta váimmolaččat guorrasit.

Siiddus 120 Stjernø-lávdegotti evttohusas evttohit ahte Sámi allaskuvla čadno Romssa Universitehtii dahje ođđa, stuorit ásaheami Davvi-Norggas.

Mii áigut garrásit váruhit dán dahkamis. Buot vásihusat lohket ahte stuorimus ovtadat báidná unnimusa iige nuppeguvlu. Dat mearkkaša ahte Sámi allaskuvla sáhtta šaddat boahtit dan seammá duohtavuhtii go dat masa oahpaheaddjeoahpu sámi ossodat Álttás bođii dalle ja mii dagahii ahte sirde ja ahte ásaheami Sámi allaskuvla Guovdageidnui jagi 1989. Evttohusat maŋŋil 1973 sierra sámi allaskuvlla birra, váruhit ge dákkár čovdosa vuostá.

Sámi eiseváldit leat maid dai buktán signálaid dan ektui ahte vuosttildit ortnega mas Sámi allaskuvla šaddá oassin stuorit ovtadagas. Stjernø-lávdegotti premissat evttohusii leat njuolgut vuostá ies evttohusa.

Evttohus šaddá maid dai veadjemeahtun jus geahččá dan movt Guovdageainnus dilli lea ovdánan. Dál lea dáppe stuora ođđa buotsámi alit dutkan ja oahpahušasa. Dát ásaheami šaddá, go boahtá sisa ođđa dieđavistái mii vurdo leat gárvvus 2009, lunddolaš ásaheami bajitdási buot sámi dutkan- ja fágalaš doaimmaide mat bohtet dán dáhki vuollái.

Molssaevttot evttohus siiddus 120 Stjernø-lávdegotti evttohusas, lea ásaheami oktasaš davviriikalaš sámi allaskuvlla, ja mii lea just nu movt buot evttohusat celket mat maŋŋil 1973 leat giedahallan alit sámi oahpu ja dutkama.

Sámi organisašuvnnat davviriikain leat searvan dákkár čovdosii, dát čájeha ahte maid dai davviriikat nanu beroštumiin dorjot dákkár čovdosa, maid dai akadémalaččat.

Loahppaboadus

Sámi allaskuvla lea áidna alit oahpahuš- ja dutkanásaheami gos bargo- ja fágagiella lea sáme giella. Dat mearkkaša ahte Sámi allaskuvla lea okta dain deháleamos giella- ja kulturhálddašeaddjin ja ovdáneaddjin Sámis ja Davviriikain. Sámi allaskuvla bidjá čadat fuomášumi eamiálbmotperspektiivii oahpuin. Dát bealit leat erenoamažat, muhto leat unnán deattuhuvvon ja boahtán oidnosii Stjernø-lávdegotti evttohusas.

Sámi allaskuvla ávžžuha ahte ásaheami buvttadeapmi dán, ja sullasaš proseassain, árvvoštallo ja mihtiduvvo eavttuid vuodul mat leat heivehuvvon ásaheami mandáhtii, rekrutterenvuđđui j historjjalaš/servodatlaš eavttuide. Ásaheami buvttadeapmi lea nu ollu eambo go oahppočuoggáid-/kandidáhttabuvttadeapmi – dás lea sáhka hukset ásaheami, bargiid gelbbolašvuoda (mas juo leat oláhan hirbmat buriid bohtosiid), vuhtiiváldit ja ovdánahttit eamiálbmotperspektiivva oahpuin ja dutkamis, hástalusat duppáliid giela dáfus (sáme giella váldogiellan, dárogiella ja vejolaččat engelasgiella go gulahallá eiseváldiguin ja ovttasbargoguimmiiguin), hástalusat duppáliid fálaldagaid hábmemis (fálaldagat sámi servodahkii, fálaldagat stuoraservodahkii – jearaldagat iešguhtet etáhttain). Dát leat bealit ásaheami, mat fertejit leat mielde árvvoštallamiin movt Sámi allaskuvla oláha iežas doaimamihtuid.

Sámi allaskuvla bargá akkrediterejuvvot iešguhtet dásiin/iešguhtet vuogádagaid bokte. Mii ohcat dieđusge akkreditere ma NOKUT čađa, mii lea našunála akkrediterenorgána Norggas, gos Sámi allaskuvla lea. Mii ohcat maidai akkreditere ma internašunála eamiálbmotdásis WINHEC bokte, mii erenoamažit árvvoštallá ásahusa vuhtiváldima eamiálbmotdimenšuvnnas ja kultuvrralaš integritehta, árbevieruguddiid rolla oahpahusas ja dutkamis, ja giellageavaheami.

Sámi allaskuvla ávžžuha ahte dahkko sierra čielggadeapmi mas vuolggasadjin lea Stjernø-lávdegotti evttohus ahte Sámi allaskuvla galgá leat davviriikalaš buotsámi ásahus – vejolašvuodát ja evtutt ovdánahttit Sámi allaskuvlla dieđadaš allaskuvlan ja dasto Sámi Universitehttan.

Allaskuvlla stivrra mearrádus ovttajienalaččat: Allaskuvladirektora árvalus dohkkehuvvo daid mearkkašumiiguin mat ovdanbohte. Hálddáhhus lasiha stivra mearkkašumiid ja stivra oážžu gaskavahkkui 30.4.2008 dii. 13.00 rádjai sáddet mearkkašumiid.

S-áši 12/08: ERENOAMÁŠ VIRGELOBIT

Allaskuvladirektora árvalus:

Sámi allaskuvlla stivra juolluda earenoamáš virgelobiid čuovvovaččat mat heivehuvvojit bušehttarámma siskkobeallái:

Mai Britt Utsi ektui:

- Mai Britt Utsii juolluduvvo dinejuvvon earenoamášvirgelobi 11,2 mánu 4.10.2008 rájes. Jus oahpahuslágideami oktavuodas lea dárbu dahkat heivehemiid, de dat dahkkojit šiehtademiid bokte.
- Mai Britt Utsi ohcamušoassi, mii guoská DOB-áiggi heiveheapmái Dr.grada čáđahanáigodahkii, meannuduvvo Dutkanstivrras 28.5.2008.

Kristine Nystad ektui:

- Kristine Nystadii juolluduvvo dinejuvvon earenoamášvirgelobi 7 mánu 2.5.2008 rájes. Jus oahpahuslágideami oktavuodas lea dárbu dahkat heivehemiid, de dat dahkkojit šiehtademiid bokte.
- Kristine Nystad ohcamušoassi, mii guoská DOB-áiggi heiveheapmái Dr.grada čáđahanáigodahkii, meannuduvvo Dutkanstivrras 28.5.2008.

Allaskuvlla stivrra mearrádus ovttajienalaččat:

Sámi allaskuvlla stivra juolluda earenoamáš virgelobiid čuovvovaččat mat heivehuvvojit bušehttarámma siskkobeallái:

Mai Britt Utsi ektui:

- Mai Britt Utsii juolluduvvo dinejuvvon earenoamášvirgelobi 11,2 mánu 4.10.2008 rájes. Jus oahpahuslágideami oktavuodas lea dárbu dahkat heivehemiid, de dat dahkkojit šiehtademiid bokte.

Kristine Nystad ektui:

- Kristine Nystadii juolluduvvo dinejuvvon earenoamášvirgelobi 7 mánu 2.5.2008 rájes. Jus oahpahuslágideami oktavuodas lea dárbu dahkat heivehemiid, de dat dahkkojit šiehtademiid bokte.

Lassin stivra dáhttu hálddáhusa ráhkadit guhkesáiggeplána earenoamáš virgelobiid čadaheamis. Ferte maid biddjot johtui gelbbolašvuodáloktenplána earenoamášvirgelobiid ektui.

S-ášši 13/08: VÁLGASTIVRRA NAMMADEAPMI ÁIGODAHKII 25.04.08 - 31.7.2011

Allaskuvladirektora árvalus:

Válgastivrii nammaduvvojit čuovvovaš miellahtut ja várrelahtut áigodahkii 25.4.2008 – 31.7.2011:

- Allaskuvladirektora (jodiheaddji)
- Aslak J. Gaup ja sutnje várrelahtun Johan Daniel Hætta
- Studeantaáirras ja várrelahttu

Sivas go studeantastivrra ii lean árvalan miellahtuid válgastivrii, addá Sámi allaskuvla stivra rektorii válddi nammadit studeantalahtu ja várrelahtu, studeantastivrra árvalusa vuodul. Árvalusat galget buktot rektorii farggamusat, vai válgastivrra doaibmagoahtá.

Allaskuvlla stivrra mearrádus ovttajienalaččat: Allaskuvladirektora árvalus dohkkehuvvo.

S-ášši 14/08: DOB NJUOLGGADUSAID OÐASMAHTTIN

Allaskuvladirektevrra árvalus:

Dutkan- ja ovdánahttinresursa njuolggadusat (DOB-resursa áсахusa ovdáneapmái)

- 1 Fágabargiide sáhtta ohcama vuodul juolluduvvot DoB-áigi. Dutkandirektevra lea allaskuvlla dutkanjodiheaddji. Dutkanstivra árvoštallá ja juolluda fágabargiide DoB-áiggi ohcamiid ja áсахusa vuoruhuvvon dutkan- ja oahpahustrategiijaid vuodul. DoB-áiggiid juolludeapmi ii galgga čuoheat allaskuvlla oahpahusdárbbuide. DoB-áigi juolluduvvo ovttá oahppojahkáii hávális.
 - 1.1 Allaskuvlalektoriidda ja 1. lektoriidda biddjo 10 - 30% DoB-áigi, mas 10 % lea DoB-vuoddoresursa. Eanet DoB-áigi (gaskal 10-30 %) ohccojuvvo sierra.
 - 1.2 1. amanuensaide ja allaskuvladoseanttaide biddjo 20 - 50% DoB-áigi, mas 10 % lea DoB-vuoddoresursa ja 10 % geavahuvvo bagadallat allaskuvlla fágasurggiid ja ovttaskas fágabargiid, sihke oahpaheami ja dutkama oktavuodas. Eanet DoB-áigi (gaskal 20 - 50 %) ohccojuvvo sierra.
 - 1.3 Professoriidda biddjo 50% DoB-áigi. Professorat eai dárbbas ovddidit čálalaš ohcama, muhto čuvvot seamma raporterengatnegasvuodaid go eará fágabargit.
 - 1.4 Allaskuvlaoahpaheddjiide dábálaččat ii biddjo DoB-áigi. Sáhtta liikká sierra ohcama vuodul juolluduvvot DOB-áigi, dábálaččat gelbbolašvuodálokten doaimmaide (omd. váldofága/masteroahpu lohkamii). Dát resursa geavahuvvo oahpahanressas.

- 1.5 DoB-áigi (earret DoB-vuodđoresurssa) sáhtta ohcama vuodul juolluduvvot sadjásašvirgehasaide, geat leat olles virggis guhkket go 1 jagi. DoB-áigi dábálaččat ii juolluduvvo fágavirgehasaide geat leat engašerejuvvon oassevirgái/oanehit áigodahkii.
- 2 DoB-áiggi ohcan galgá ovddiduvvot čálalaččat sierra skovis mas leat dát dieđut: proševtta namma, fágalaš čilgehus, čilgehus mo prošekta lea čadnon Sámi allaskuvlla strategalaš plánaide, čilgehus mo prošekta lea ávkin bargi gelbbolašvuoda loktemii, plána dutkanbohtosiid gaskkusteapmái ja almmuheapmái ja proševtta čađahanplána.
- 3 DoB áigi juolluduvvo ohcama, proševtta fágalaš árvoštallama ja ovddit DoB áiggiid bohtosiid vuodul. Eaktun DoB áiggi juolludeapmái lea ahte ovddit DoB áiggiid bohtosat leat raporterejuvvon.
- 4 Fágabargit geaidda lea juolluduvvon DoB-áigi galget reporteret proševtta čađaheami ja bohtosiid sierra skovi bokte. Fágabargi galgá registreret proševtta doaimmaid ForskDok vuogádahkii.
- 5 Jus muhtin fágabargi vállje oahpahit eambbo muhtin jagi/jaggiid, de sáhtta čohkket DOB-ressurssa mañit áigodahkii soahpamuša vuodul.
- 6 Jus fágabargi ii sáhte čađahit DoB-proševtta nu go lei ohccojuvvon, de lea geatnegahtton čálalaččat dieđihit dutkanhálddahussii farggamusat dahkan dihte ođđa soahpamuša dutkandirektevrrain. Jus fágabargi hálida rievdadit juolluduvvon DoB-áiggi fágalaš sisdoalu, de čálalaš ohcan galgá ovddiduvvot dutkanhálddahussii. Dutkandirektevra mearrida ohcama. Dákkár áššit mannet diehtun dutkanstivrii.

Allaskuvlla stivrra mearrádus ovttajienalaččat: Ášši mañiduvvo, ja stivra dáhttu ahte njuolggadusat heivehuvvojit daid ođđa njuolggadusaide mat Sámi allaskuvllas jo ovddežis leat.

S-ášši 15/08: SADJÁSAŠ DIREKTORII SADJÁSAŠ ÁIGODAHKII 13.5.08 – 6.8.2008

Allaskuvladirektora árvalus:

Sámi allaskuvlastivra addá rektorii válddi konstitueret sadjásašdirektorii sádjásačča, áigodahkii 13.5.2008 – 6.8.2008.

Allaskuvlla stivrra mearrádus ovttajienalaččat: Allaskuvladirektora árvalus dohkkehuvvo.

S-ášši 16/08: EARÁ – SÁGASTALLAN DIEHTOSIIDDA BIRRA

Stivra dáhtui ságastallama diehtosiidda birra, go ballet leat menddo unnán kantuvrrat go ođđa diehtosiida gárvána.

Stivra dáhttu oazžut “oversikt” latnjadili ektui, vai oaidnit dan dárbbu mii ásahusas lea. Ášši biddjo guorahallamii ja golggotmánu čoahkkimis mitaluvvo státus diehtosiidda birra.

Eai lean eará áššit.

Čoahkkin nogai diibmu 12.30

Steinar Pedersen
Rektor

Márjá Katarina Páve
Doaibmi allaskuvladirektora

Risten Rávna Länsman
Čáli